

# T'ANI ULA?



Mureerihwe, munna. Ti yooreera saana owerya orwa mpaani mw'Apwiya.

<sup>2</sup> Miyo kinoona wira kaamusoma Yoolempwa emosa, okathi vakhani ovinre, nto Eyo ehimmye wira okathi Yesu aattamenleawe oYerusalemu, wira awiixutti yaahivenxa maitho aya khoona muttetthe woowaarya ottaiwene, vano awo khupaceryasa otthapa n'uhimya, wira, "Vano omwene onootikihiwa."

<sup>3</sup> Nto mulopwan'ola mmosa aamuhimya, ahiiso olavula mwaha w'oxekurya naanaano oPalestina, nto owo khwira wira atthu vano, mwaisana, anniphiyerya nipuro wira, awo yaawelaka veekhatoni khunaweha vakompa, ephiro emosaru Yesu ni awiixutti yaary'aya okathi yoowo, wira voonalyaaya muttetthe, awo yaahipacerya wunla.

<sup>4</sup> Moosuwela, kookupali, wira yaahikhala etthu awiixutti ale, mahiku ale, yoonaly'aya, wira—wira omwene waamuttikiheriwa-tho.

<sup>5</sup> Nto vano wookhuveela okathi. Ni kookupali wira owo ti moonelo ori mw'atthuni, wira omwene ohanle olikana wira ottikihiwe-tho.

<sup>6</sup> Munna Neville, pastore ahu ooreera murima ni ooreerihwa, onoomalaru olavula ni miyo mwaha wo wiilipiha wira okhale muhakalaliho onoorwa va mutapernakulu, ohiyu kamosa-kamosa, wira nivekeleke mwaha wa yoowo. Nto miyo kimuleela, wira kaahuupuwela wira yaamukhala etthu yooreerihwa.

<sup>7</sup> Khamukhanle okhalanaka mihakalaliho sinci-enexa. Ni imaara sinci-ene hiyo ninnikhalana muupuwelo woovonyeya wa muhakalaliho. Muhakalaliho khuhiyo vanci-enexa wo waaruuha mamempuru asya, masi wo wira ohakalalihe ele hiyo erinaahu. Nto miyo ki . . .

<sup>8</sup> Okisivela ohimya yeela, okhala wira kinihimya okhuma muhina mmurimani mwaka. Wira kinnipacerya ophwanyanya moonelo woovirikana varyari va etapernakulu ovikana sinkhalak'aya okathi munci-ene, moonelo wa—wa moonelo wowiixerya wa muroohoni, ntoko waakhalak'aya, okathi munci-ene ovinre; etthu ile eniikhaliha, ni erina mulipiheryo w'ekeekhai. Ni kinniroromela wira Muluku onooreerihwa ekereja ela yaamukhaani, ni . . . ? . . . emaara ekina mwa owerya waya.

<sup>9</sup> Ni kinnoona etthokiheryo y'oteka empa ekelelaka ohoolo, ni kinoona wira eyo etthu yuulupale. Tthiri, naanaano wala ohoolo, hiyo atthu aalweene ninoorowa orula ikaruma nivahererye mmatatani mwa an'ihu, nto niwele Exikatta ele ya weero.

<sup>10</sup> Nihiku nikina kaahivira maarakha ale a nuusu n'ephiro vano, a miyaakha miloko mithanu. Nkinwerya osuwela saana eyo. Khenikhala ntoko wira khovinre okathi okhuma waamuteexeryaaka soolya Chris Meisner, kirine-ene miyaakha soophiyaka muloko ni mithanu na miraru, muloko ni mithanu na mosa, muloko ni mithanu na miraru. Masi woovira tu. Eyo enrowa wooniherya paahi wira mu hiyo khanrina muttethe w'okhala mahiku othene, masi nimphavela Ole onrwa. Nto owo ti Muttethe Muluku okhanlyaawe namateka, ni khenrowa okhala-wo emalelo iwo.

<sup>11</sup> Voosiis'ula, ntoko saalavul'aka mwaha wa Nihiku n'Aximaama, ni kiphavelaka omuhela maama kahi ntoko owo vekeekhai siry'awe, mwa munnuwelo wo wuuluvala, ni mannyaari, ni sothene iya, attootto awe, wala ekhatera ya iroota, wala ekhatera yoowoolowa, ni ekahi yaamukhaani ya maluwa aattamenle-ene; masi maama moohihimuwani, ottikiheriwe-ene omwali awe, ni eemenle, aaryaka ntoko pwiyamwene. Ti siiso vankisivela owupuwelela ame aka. Khonkisivela owupuwela ntoko siryaaya olelo, oowuuluvala. Onkisivela wupuwela ele enoorwa. Ni koosuwela wira nyuwo munoona siiso mwaha wa aximai anyu. Owupuwela ntoko awo vekeekhai siryaaya mmurimani mwaya. Anamwi anci-ene . . . ntoko mulipa-oolepa sinihimyaawe, "Makhalelo khankhalaka ookhweya w'awo, masi awo yaamukhala sothene emaara ekina, wira paahi ewiireleni ethu." Tivo Muluku onoorowa opaka enamuna wira awo akhale mukumi voohimala ni nyuwo. Vano kinnitteeliwa murima mwaha wa yeeyo.

<sup>12</sup> Nkisuwenle mwaha wa xeeni, koohimya, voosiis'ula, wira kaamulavula ohiy'ula, Apwiya yatthuna vale, mwaha wa: *Tani Ula?* Vekeekhai nkinsuwela moota onrowaaka wira. Masi kaarina muteko mpakha okathi woophiyaka ewoora emosa ni minuutu muloko sivinre, ni mivaanelo exekuwa yothene, ni kaarina s'omeekha ni—ni wihaniwa woowaakuveya. Nkaawenrye ocalela.

<sup>13</sup> Ni kintthuna wira mutthikele munvekelelaka Totori Sam. Owo—owo onnikhala saana, ni hiyo ninnixukhuru. Ni Totori Baldwin ni Muhano Baldwin oowanli anoopenuwasa. Awo annikhalasa saana.

<sup>14</sup> Kintthuna wira mmuhele-mo mmosa mulistani mwanu mwa mavekelo, oxekuw'ola. Owo ti Haary Lease vakhiviru nno, nafaramaasiya. Harry ti mpatthani aka a omeekha. Nto okhuma okathi omusuwenly'aka, kuupuwela wira aari muKristu, mpakha oxekuw'ola, okathi munn'awe ovekenlyaawe woopoliwa wa munep'awe. Munna Mike Egan ooruuha i . . . atiministaratoore ahu va, t'oruu hale ihapari. Nto Harry ori mukhalelo mmosa woosankiha, oxipiritaali. Miyo nkaasuwela wira owo aanikuupuwela vanci-ene siiso; masi, owo oomukhootta pastore awe, oxekuw'ola, kiireke pastore a ekereja

weiwo owo onrow'awe, ni aathhuna wira kirowe kamoone. Nto kintthuna kirowe kamoone. Tivo, munvekelele Harry.

<sup>15</sup> Nootteeliwa murima va, ohiy'ula, osuwela, ti apatthani aka va, anikhuma oGeorgia, Munna Welch Evans n'amusi awe. Kinniwoona, nave-tho, aletto akina kahaasuwel'aka, alakela yaari vaava voosiis'ula.

<sup>16</sup> Kaahivonye vale, kinniwoona Munna mulopwana ni Munna muthiyana Elmer Collins ottuli iwe, a oPhoenix, Arizona. Oh, nyuwo khamurukununwe. Enkhala ntoko mwaahaana wira nwanre-ene ikuwo sanyu sa muxipooroni, ni—ni mukhumaka muliinyani mwa kampoyi. Nto mutthikele vooreera owaani! Nkikhanle woovekelani wira mukhale wenno, okhala wira moophwanya nipuro nooreeraxa, moone, nikhanelle nooreera saana, oPhoenix. Miyo kaanithhuna kikhalaka wuuwu, nihiku nlo, yoomi.

<sup>17</sup> Vano nto kinnimoona Munna Smith va, a Ekereja ya Muluku, wu. Munna Smith, kaahivahiwa, eliivuru anyu yaamukhaani, nihiku nlo, ahiiso nsana oxeukuwa, oxeukuwa. Nkinatthi osoma nlelo, masi veekkehai kinookhaliherya, mwaha w'osuwela paahi wira ti nyuwo mulempe. Ehaana okhala Yoolempwa y'eekkehai, ya khweeli. Muluku ooreeriheni. Ni kinroromela wira owo mureerelo.

<sup>18</sup> Ni anci-ene akina, miyo kaamuwerya ohimya. Nyuwo othene mukhale oorwa saana va otapernakulu. Ni naahikisivela nsipo nle, voosiis'ula, na Munna muthiyana Sticker oipale, "Owo oninweha mutreliisani, owo." Axinn'aka aMennoniita nno, kootteeliwa murima okhala ni yaawo. Nto, oh, othene anyu! Mpatthani mmosa va, kookupali, a oIllinois, mwan'awe mulopwana onookaravari ottuli iwe, kinoorowa owerya okumana-tho ni yaawo. Ni anci-enexa, kaamuwerya... Muhuupuwele wira kinimoothanyani kaahiromoleke nsina nanyu, masi kinniwaakhelani orwa vooreera nyuwo othene.

<sup>19</sup> Vano nrowe nisome ohiy'ula, mwa nisomi na Soolempwa, mwa Matewu kapiitulu 21, opacerya versiikulu 1, nisomaka nittharihaka, ni 11, nave.

*Nto okathi waakhuweenlyaaya oYerusalemu,  
yaahirwa, yaahiphiya oPetifaxi, omwaako Olivera, nto  
Yesu aahaaruma awiixutti anli,*

*Aahimeeryaka wira, Murowe muttethe ori  
ohoolo wanyu, mukelakaru munoomphwanya  
puuru otthukweleliwe, ni mwaapuuru ni yoowo:  
mwaataphule, mukiruuhele.*

*Akhala onrowa woohimeeryani etthu,  
mwaakhule wira, Apwiya tanaaphavela; siiso owo  
onimwaaveleeliha.*

*Sothene iya siiraneiyē, wira simaliheriwe sihimmwe  
ni profeta, wira,*

*Mwaaleele...aana axithiyana a oSiyoni wira,  
Mmoone, Muene anyu onrwa mwa wiiyeviha...  
amukilaathenle puuru oothiyana, ni mwaapuuru  
onteexa miritti.*

*Vano awiixutti yaahirowa, khwiira siiso ntoko Yesu  
saarumme-awe,*

*Nto yaahimuruuha puuru, ni mwaapuuru, khwaatala  
ikuwo saya vasulu vaya, nto khimukilaathiha vasulu.*

*Ni muttitthi w'atthu waanaatala ikuwo saya mphironi;  
ni yaaninta makukhu mmirini, khiyaatalela mphironi.*

*Nto muttitthi wothene waarowa ohoolo, ni ale  
yaamutthara, yaanikhuwela, yiraka, Hosana nwaana  
a Davidi: Attotopeliwe ole onrwa ni nsina n'Apwiya;  
Hosana wirimu.*

*Nto owo okelaka oYerusalemu, muttetthe wothene  
waaheekeseya, ahimyaka wira, Tani ula?*

*Nto muttitthi wothene waanaakhula wira, Ola ti Yesu  
profeta a oNasareti...*

Nrowe nuuramihe miru sahu wira nilompe.

<sup>20</sup> O Pwiya, hiyo ninniikoha paahi exeeni naarowaahu ohimya, vaakhanle wira naahikhala mahiku ale. Masi hiyo ninkhala nihiku nuulupalexa, okathi oninwehereryaahu Owo orwa. Nto okathi onitthokihaahu, Pwiya, nikhalihaka mirima sahu soolikana, ni niruuhaka mavisi othene ninweryaahu othukumanya mmapuwani mothene moohepha, mulaponi mwahu ni ilapo s'okhopela, ninnuupuwela ni owehererya okathi onrowaahu omoona Owo orwaaka, eettihaka ekhavallo yootteela, akhuruwaka okhuma mikhora sa Movuwani, wira arukunxe ni uupe irutthu sahu iya sa khalayi sinintta, akhalihe erutthu yoovuwa ntoko ele Yawawe, memmo ohinweryaneya okhala-wo etampi nnakhala okela eneneeryo ya okhwa. Nto hiyo ninoorowa omoona Owo ntoko Owo siryaawe, ni ninookhala, ni omphenta Yoowo mwa okathi wothene onthuna orwa.

<sup>21</sup> Hiyo ninnooxukhuruni Nyuwo mwaha wa ekerej'ela ni pastore aya, ni wa maatiministratore ni matiyaakono, ni wa khula mutthu onrwa va; ni wa aletto ari muhina mwa mikhora sahu, sikhanelle ipwittipwitthi sa nikoto nimosaru, masi sa nikhoma nikina. Naatthuna noovekeleni Nyuwo wira mwaareerihe, ohiy'ula, ni Mukhalelo Anyu.

<sup>22</sup> Ni munilyihe Masu Anyu, wira niwerye orowa okhuma va, ohiy'ula, ni eminyalelo y'okhala aKristu oolokaxa ovikana sitonko ahu okhala. Nirowe ni nrromelo musya mmurimani mwahu, ni n'utthapa, nilipelelaka Orwa Wawe.

23 Vairaneya okhala amosa-amosa eriyari ahu, akhanle aretta ni oovela-vela, khinaatthuna oliyala waavekelela. Wira awo. . . Evolowaka mpaani mu, ohiy'ula, vaava othukumann'ahu wira nikokhorele, yaavolonwe-ene, aretta, ekhume akumi.

24 Ni naatthuna niveke mwaha w'ale anipacerya ovona, mmaitthokoni ni mmaxipiritaalini, ni ari mmoolilini wa muxankiho. Hiyo ninnivekela, O Muluku, wira omoriwa Wanyu ikharari waaphiyerye yaawo.

25 Hiyo naatthuna naavekelele ale ari oohicaliwa, ohiy'ula, yaawo nlelo ahilawinhe khoona wira Apwiya t'oreera murima, ahinsuwela etthu enihimya ophentiwa ni Muluku. Awo khansuwela tu etthu anihaleel'aya. O Muluku, eprokrama emosa ya muraatiyuni, wala enamuna khata, ekwannye mirima saya, ni miyoonelo saya sirukunxeriwe wa Nyuwo ohinatthi mukhora wa omoreliwa ikharari owaleya ni awo owaleliwa ota, wira evire moophukiwani ehirina omoreliwa ikharari.

26 Munikhaliherye, Pwiya. Itthu iya hiyo ninvekela mwa Nsina na Pwiya Yesu, ni wa ovuwa Wawe hiyo ninnivekela. Amen.

27 Atthu yaari oophunyana saana mmikhorani, ni iphiro saari soosareiwa, ni khiwaakhanle hata opuro wira atthu arupe. Awo yaampaathale epantte y'ota wa exiri, oomwaramwareya vathi, okhala wira ola aari paasikha. Nto atthu jaarwiiye okhuma mulaponi mothene waasuveliwa, wira ekokhorele okathi ula. Waari okathi mwaapwittipwitthi a paasikha aaiwiwaawe. Ni e. . . Eyo yaathoonerya otaphuwa waya okhuma w'Ejitu, mw'epothani. Nto awo yaanisuka yeela, khula mwaakha. Khula mwaakha, paasikha ola muulupale aaniiraneya. Ni waari mmosa wa okathi woosuwanyeyaxa wa e. . . wala maira a etiini ya Eyuuta, okhala wira waahimya okathi awo yaavuluxiwaaya.

28 Atthu othene onnaasivela wuupuwela yeeyo, okathi yaavuluxiwaaya. Moota khula mmosa a hiyo, ohiy'ula, onwery'awe otthikela okathi ovuluxiwaahu! Etthu yaahimy'aya wa hiyo!

29 Kinniwerya wuupuwela musuwelelo aka yoomi, wa moota murim'aka w'enamwane waatthunaaya omukwannya Muluku. Miyo kaanuupuwela, "Oh, vaakhanle wira kaaniwerya paahi owela kamane mukhora Awe, n'ulavula-No okathi vakhani!" Nto, vekeekhai, nyuwo munnimusuwela wahala aka. Miyo kaahikuxa epaphelo ni elaapi, nto kaarowa omulepela epaphelo Yoowo, okhala wira nkaawerya olavula ni Yoowo. Ni kaahisuwela wira Owo aakhala mutakhwani, okhala wira kaaroomwiiwa Owo, ni kaahimooni Owo eettaka mutakhwani. Ni e—ephiro, emosa miyo kaasuwelaaka yeeyo kaavirakaaka kaaxayaka wala kaarowaka omiserya. Kaahuupuwela, "Kinrowa okhomela vamwirini, ni kinveleliherye Mwenye Yesu." Yaari enamuna emosa paahi ya muritti ule waakhanle-aya okumihiwaka mmurimani mwaka.

<sup>30</sup> Oh, ohiy'ule, ohitto iwe! Pooti oliyala munnuwelo aka, pooti hata oliyala nsina naka nihiku nlo, masi nkinkhalakhala kiweryaka oliyala okathi yoowo Owo okivulunxaawe mwa etampi. Etthu emosa yaahiiraneya, muhina mwa miyo, yeeyo yaakikhalihenrye okathi muulupale wa mw'epiphini. Okathi wo ovuluxiwa waka, miritti sa etampi saahikihiya, nto kaari mutthu musya. Miyo ka mutthu musya mwa Kristu Yesu, okhuma vaavo.

<sup>31</sup> Nto aYuta ala, awo yaanirwa, khula mwaakha. Ni yaahikhala e—ephattuwelo emosa mukereja. Ni awo yaanikuxa mu—mukatthe, ni malaxi oowaawa, ni mwaapwittipwitthi, ni yaawurya veephattuweloni vaava mukereja. Ni yaanittthapa vamosa okhala wira Muluku aahiwooniherya ocaliwa. Tivo, ola okhalaka okathi wa paasikha, ni kahi aari paasikha paahi, masi aari paasikha mmosa oosuwanyeya.

<sup>32</sup> Nyuwo moosuwela, sookhala imaara sikina hiyo onrow'ahu okereja ni . . . Hiyo kweekwe onnisisivela orowa, masi sookhala imaara sikina etthu yoosuwanyeya enkhumelelaaya.

<sup>33</sup> Nto ola waari mmosa wa okathi seiyo. Ettheeku yaari yoosareya muroromelo, siiso ntoko siryaaya olelo. Maitho othene a ale yaampenta Owo yaaninwehererya Owo ovolowa vamukhora.

<sup>34</sup> Ni kookupali wira ti vanci-enexa siiso olelo, maana ale animphenta Yoowo anninwehererya Yoowo. Ettheeku eri yoosareya owehererya.

<sup>35</sup> Okathi, onkhal'ahu nihiku nla, okathi elapo vekeekhai eryaaya, ekhanlyaaya mwaapu muulupale wa oka. Ni siyensiya onnihimeerya wira, "Sinihala minuutu miraru paahi mpakha ohiyu eriyari." Ni kookupali wira nyuwo mwaammusoma, ntoko miyo, nihiku nlo, wahala a mukhulupale ola a anakhotto, iirale, wira, "Yaakhanle-ru ekhotto ekina, yaarowa wiiraneya minuutu miili paahi wala miraru." Mahiku a khalayi oowana, ni woopa ikapwitthi, ni othipa ikhokwe, sothene iyo soomala. Enihimmwa wira ekhotto enttharelana enrowa okhala minuutu miili wala miraru paahi. Nihiku nlo, mutthu mmosa ootepanyeya onrowa otepanyeya oope emosa wa ipholovolo iyo. Nto awo yaira vale, hiyo nihaana mapuro oowiiwelela, mapuro othene, wira naakhule noopaka naanaanoru. Olumwenku khonwerya ovilela eyo tu.

<sup>36</sup> Atthu othene opaasikhani yaahisuwela wira etthu yaamurowa wiiraneya, masi awo khayaasuwela vekeekhai yaari exeeni.

<sup>37</sup> Nto ti siiso siry'aya olelo. Atthu anci-ene annisuwela wira yookhala etthu ehanle wiiraneya. Atthu othene annisuwela eyo. Nyuwo pooti olavula ni natampi, nyuwo pooti olavula ni mulipaa nakoso, nyuwo pooti olavula ni khula mutthu, ni, oh, okathi woovelaveliha wa olumwenku.

<sup>38</sup> Masi nyuwo pooti olavula ni mulopwana wala muthiyana ommulipelela Owo orwa, nto ovuwa ori wiitho waya, waaryaka. Awo anwehererya yookhumelela eyo yuulupale. Vano ettheke yothe ne ti yoosareya-tho, ewehereryaka etthu okhumelela. Olumwenku khonsuwela etthu ehanle okhumelela, masi Ekereja ya Muluku mukumi ennisuwela etthu enrowa okhumelela. Awo annisuwela wira vahilekenle nlope ninoorowa oruma, nto hiyo ninoomoona Owo orwa, eettihaka ekhavalu okhuma Movuwani, vakhavaloni yootteela, ni anakhotto a Wirimu emuttharaka Yoowo. Nto ale akhwiye mwa Kristu anookuxiwa eroihiwe yakumane ni Yoowo osulu. Ti yeeyo enweherery'ahu. Hiyo ninniwehererya yeeyo.

<sup>39</sup> Ni ninnihimeeriwa wira minepa s'aximai ale, ni sikina, nilavunlyaahu voosiis'ula, vathi v'altaari a Muluku, sinnikhuwela, "Mpakha liini, Pwiya? Mpakha liini?" Maama onthuna owoonani nyuwo vanci-ene ntoko nyuwo munthunaanyu omoona. Ni ale oophentiwa ahu anthhuna okumana ni hiyo vanci-ene ntoko sintthun'ahu okumana n'awo.

<sup>40</sup> Othukumana xeeni onrowa okhala owo, okathi Owo onrwaawe! Wira nakumane n'ale oophentiwa ahu ni owoona mweerutthuni mwaya yoohihimuxiwa, ni oovuwihwiwa, ni weeta ni murithi a ohihimuwa, niwehaka mukhalelo aya, moota orukununwaaya, wiimaaliha ni emaalalo. Ni khenrowa okhala evutukavutuka ni osukhumana, maana ninrowa okhalana Ehimalelo yothe ne wira nikhaleke vamosa.

<sup>41</sup> Oh, okathi ula muulupale wo wuukhuwa onkhal'ahu, kuuvo okathi wa hat'etthu, otthimaka paahi, ni osukhumasa, ni waakha, vano, nihiku noowoopiha.

<sup>42</sup> Nto, okathi yaalipelelaaya wira etthu yiiraneye, yaari y'othunku wira anci-ene w'ale yaari opaasikhani khiyaaphiyerenrye omoona Owo. Nnakhala vo, awo yaahisuwela wira yaahikhala etthu yaarowa wiiraneya, masi nlelo awo khiyaaphiyerenrye omoona Owo.

<sup>43</sup> Siiso-tho onookhala Orwa w'Apwiya. Aakhala atthu anci-ene ookattamiheya, olelo, ansuwela wira etthu ehanle wiiraneya, masi awo—awo khankhalakhala emoonaka Owo. Maana Owo onrowa orwa mummaaleleyoni wa ohiyu eriyari, wira okuxe Ekerej'ele yaamukhaani emphavela ni enlipelela ewehereryaka omoona Yoowo. Ti yaawo Owo onrwaawe ni waakuxa. Anciene a molumwenkuni ankhala moottetthekhuni, ni epuhihaka minepa saya mwa itthu sa molumwenkuni, nnakhala khanrowa osuwela etthu ekhumelenle, mpakha Ekereja orowa Movuwani, maana Owo onrowa orwa ntoko nawiiye ohiyu ni aakuxe. Tivo ninniweriya woona wira nootthikela nipuro nimosaru. Vano ninnoona, wira, owehererya nno, wira Muluku onaarweela ale a . . . Mwa Soolempwa sothene, ennikhhalaka etthu emosaru. Wira awo a . . . Owo kweekwe onaakhumelela ale aninwehererya

Yoowo, kweekwe w'ale anthuna omoona Yoowo. Ni miyo kookupali wira owo ti nrromelo ori vamurimani vahu ohiy'ula.

44 Soovira miyeeri soophiyaka mithanu na mosa, woona waka, kaahimeerya onamoona atthu kamosa-kamosa. Nto miyo khwira, "Oh, wuupuwela eyo, wira okathi p'ukathi Owo onimoorwa!"

45 Nto etthu yaakihimihale yeeyo, miyo kaalavula sa Munna Bosworth. Okathi waaronwaaka omoona santu ule mutokweene, vaaiwalyaahu wira aamookhwa, miyaakha miloko mithanu na miraru n'etthu, amwaar'aka ni miyo nirowaka o...weiwo omoona owo ohinatthi okhwa. Kaahaana omuhimeerya etthu tu yoowo. Okisivela waaweha masantu yaavolowaka Movuwani, ni kaahaana omoono owo. Ni naahilaliha ipenewu sa ekaaro.

46 Masi vaphiyalyaaka iwe, khwaakuvela vamukhora, vanloothoni nikhaani aaphwanyaneya tiithi ule mutokweene. Owo khuxenxa muru awe okathi okoonalyaawe kirwaaka. Miyoono sawe, soowuuluvala ni sootteettheya sithomeiwe-ene, ni ethayi yoowoolowa. Nto owo khukookolela miyoono sawe. Nto miyo khunvara muxikoni khukhuwela, "Atithi aka, atithi aka, ikaaro sa wIsarayeli, ni anakhavalo aya," maana owo aari mutthu ooreera murima, ni a othunku.

47 Nto miyo khwira, "Munna Bosworth, kintthuna kookoheni etthu emosa. Munnaamini wira munookhala mukumi?"

Owo khwira, "Oh, hata nkinwereiwa."

Miyo khwira, "Ahe, mulattu ene xeeni?"

48 Owo khwira, "Kinrowa Owaani." Owo khwira, "Kookhulumuwa, ni koomalamala. Nto miyo kintthuna orowa Owaani tu."

49 Miyo khwira, "Vano munnisuwela wira munookhwa?" Miyo khwira, "Kintthuna kookoheni etthu emosa. Mwa miyaakha miloko mithanu na miili n'etthu sa orumeyi, minuutu xeeni wawinyu okhanle woovuwaxa? Mwaamuwerya olavula ni miyo, mulopwana, ni okileela musuwelelo mwaarinaanyu, mwa ekumi anyu, mwaakhanlyaanyu ohimyaka okhala ewoora anyu yuulupalexa."

50 Miyo kakhalaru mpakha munnuwelo awe, nkinkhalakhala kiliyalaka okathi maitho ale ooriipa yaakiwehale-aya, vasulu va ilumeta iye. Owo khwira, "Munn'aka oophentiwa, ola okathi muulupalexa wa ekumi aka. Nkinwerya wuupuwela hata okathi mukina waari woovuwaxa ovikana naanaano va."

51 Miyo khunweha wiitho, nto khwira, "Mwenye, nyuwo nlelo munnisuwela wira munookhwa?"

52 Owo khwira, "Munna Branham, miyo kimpaaathale va, kilipelelaka khula minuutu wira Owo ahule mukhor'ole arwe, akiroihe Owaani ni Yoowo." Eyo t'inamuna yo okhwa. Eyo t'inamuna yo orowa.



53 Nto ntoko sinsuwel'anyu, wira, iwoora soophiyaka piili owo ohinatthi okhwa. . .Owo aari, owo aari ootupha, woovikana mahiku manli. Nto okathi oitthikenlyaawe, owo khuyenya musaala, khupacerya olavula n'amwaar'awe. Nto, naanaanoru, owo aakhala ntoko owooneela. Vano owo khuvahana matata, ewoora ntero wala yoovikana, n'apatthani, yaawo akhwiiye mwa miyaakha miloko mixexe wala miloko mithanu, yaawo yaari atthu awe oorukunxa murima mukereja mwawe. Khuvahana matata n'ame awe ni atithi awe. Mpakha owo okhala. . . ekumi ohiya erutthu awe, khuphiteerya vamusawuni khurowa orupa, mmoononi mw'Apwiya Yesu. Khiivo hat'etthu ntoko omurumeela Yoowo, ni onwehererya Yoowo.

54 Nto okathi kaalavulaaka ni mulopwan'ola mwaha wa yeela, ni khimuleela musuwelel'ole, miyo kaahihimya ela. Miyo kiirale, "Mulopwana, oh, khenrowa okhala yoovuwa okathi onrowaahu omoona Yoowo? Oh, vaakhanle wira Owo aamoowa olelo!"

Owo khwira, "Munna Branham, muhaatutuxeke atthu siiso."

    Miyo khwira, "Munihimya exeeni?"

55 Owo khwira, "Oh, muheererye waaleela atthu wira olumwenku onimoorwa, ahiiso Kristu onimoorwa. Eyo ennaaxankiha."

56 "Oh," miyo khwira, "nnari. Kileveleliwe. W'ale aninwehererya Yoowo, iya ihapari soovuwaxa awo yaakhanlyaaya wiiwaka, wira Yesu ohanle orwa ni okuxa Ekereja Awe." Wuuluvala onoorukunxiwa okhale omiravo. Otthapa onoovahiwa ohiya oxanka. Ekumi enoovahiwa ohiya okhwa. Ohikhwa oranteliha olakeya, onoorukunxiwa. Oh, okathi xeeni, osuwela wira Owo onimoorwa!

57 Awo yaamulipelela Yoowo. Awo yaanwehererya Yoowo. Nto Owo varwiiyaawe, hiyo noophwanya wira yaahikhala makhuru manli. Nikhuru nimoso naamweemererya Yoowo, nto nimoso naari noonvirikanya Yoowo.

58 Nto ti siiso hiyo nimphwanyaahu olelo. Ti yeeyo, orwa Wawe, kweekwe onnaakawanya atthu. Khula okathi, munimphwanyaanyu Yesu, munnaaphwanya ale vaavo yaarowa okhala oovirikanya Yeeyo. Owo ti Satana. Nto, olelo, nuupuwelaka yeeyo, khaninoona orukunuwa vanci-ene. Vamosaru paahi. Atthu aarukunuwa, masi erooho y'atthu kherukununwe.

59 Tivo vookiserya vawehalyaaya ota wa mukhora khumoono Owo orwa, onwenle-ene mwaapuuru ule, ootteela, khivanxankiha awiixutti yaapaceryaaya o-okhuwela, "Omwene wa Wirimu woophiya!" Atthu yaahithimaka orowa okumana ni Yoowo, ni Yerusalemu wothene waaheekeseya. Yookhala etthu mwaha wa yeeyo, Yesu aarwaaka, kweekwe onnikhala

weekeseya. Nto muttethe wothene waaheekeseya. Vano khiva—khivanweryaneya ovitha.

<sup>60</sup> Ni alaleyi a nihiku nle yaahaana waakhula mwaha wa weekeseya nno, okhala wira waari oniirani na paasikha. Nto awo yaahikhuwela, “T’ani Ula?” okathi etheku yaasanryaaya, ni orwa w’Apwiya Yesu, oYerusalemu, waahisariha etheku ni miroromelo, enkhala wira alipa-oowixuttiha yaahaana osuwela ele yaarowa okhumelela. Yaakhala wira mukhulupale a anamukuttho aamwiira osuwenle. Yaakhala wira anamukuttho othene akina yaahaana wira esuwenle.

<sup>61</sup> Ni kherukununwe hat’etthu, olelo, okhala wira Erooho Yoowaarya enihoolela Orwa w’Apwiya Yesu. Nto okathi Erooho Yoowaarya enipaceryaaya omwareela mulaponi, miyooro sa muhakalaliho sinoomwareela, mapuro othene, ithoonyeryo suulupale ni mitikiniho sinniiraneya, ovonihya onniiraneya, ilaleeryo sinnihimmwa. Iparakha sothene s’arummwa vamosa sinnitthikela-tho Ekereja. Vano, ntoko saaryaaya okathi ule, siiso t’ery’aya vano, erooho ya mulipa-ooaamini nlelo ennithamala, “T’ani Ula?”

<sup>62</sup> Akina wa awo yaahimwaamini Pwiya Yesu, ohimya wira Owo aari Mutthu oreera murima. Akina w’awo yiirale, “Owo Mutthu oreera murima.”

<sup>63</sup> Ti yeeyo awo anihimy’aya olelo. Awo aneererya omukhaliha Owo ntoko Napoleawu, nakhotto. Awo aneererya omukhaliha Owo ntoko mmosa—George Washington mmosa, mutthu a nneema. Masi Owo aahivikana eyo.

<sup>64</sup> Mooweha osoma wa Yoolempwa? Awo yiirale, “Ola Profeta onrwa okhuma oKalileya.”

<sup>65</sup> Ni awo aneererya ohimya etthu emosaru olelo, okathi anoon’aya mweettelo ola muulupale w’Apwiya: waahokoloxerya, ekumi, aretta n’ale ooxanka; owoona Awo orumeela Erooho Aya Mukereja mw’Aya, wira elamule miyuupuwelo sa atthu; owoona Awo wira voolikana ntoko Awo siiralyaaya okathi Awo yaaryaaya mulaponi mu, omaliherya ele Awo yaahimyaaya wira yaamwiiraneya; vekeekhai, ikereja ni atthu enkhala ntoko wira, ankoha yeela, “T’ani Ula?”

<sup>66</sup> Awo khayaamusuwela ole aari Yesu, okhala wira khaavo hata mmosa a awo aawerya omusuwela Owo, ni ixikola saya. “Eseminariyu xeeni Owo okhummyawe-wo? Exikola xeeni ya teyoloxiia Owo okhummyawe-wo?”

<sup>67</sup> Ni siiso t’ery’aya olelo. Atthu anci-ene anttikitheliwa ni Erooho Yoowaarya khakhumme hata eseminaariyu. Iyo mihokorokho sa othanla wa Muluku mwaneene. Masi ithoonyeryo ni miiriirya, ni mitikiniho sihimmwe mBibiliyani, sinnitthara Erooho Yoowaarya ela yuulupale okathi Eyo eneetteet’aya eriyari y’atthu.

68 Nto awo aniira olelo, “T’a exikola xeeni awo?” Vammal’anyu okela mmuttettheni, okhaliha muhakalaliho, “Muromolelo xeeni muniir’anyu mpantta?”

69 Kaahikhalana nvaanelo Namathanu oxekuwa, ni namukuttho muKatolika muRooma a ekereja ya oIrlanda oLouisville. Nto kimalakaru osuwelihiwa owo, mulopwana mmosa oosoma saana, owo khwira, “Mwenye Branham, muri ni muromolelo xeeni?”

Miyo khwira, “Miyo nkikhanle ni hata mmosa.”

Nto owo khwira, nto, “Nyuwo mookhalihwa murumeyi?”

Miyo khwira, “Ayo, mulopwana.”

Owo khwira, “T’ani ookhalinheni?”

70 Miyo khwira, “Apwiya Yesu aakivaha Erooho Yoowaarya, wira kilaleerye Ehapari yooreera, ni aakiruma.” Ahe, iwo p’ukhalihwa murumeyi hiyo onttun’ahu.

71 Yesu khonatoko waahimeerya awiixutti Awe, “Murowele e...” Miyo nkinuumela itthu iyo, masi iyo saahikhala nihiku naya. Owo khohimye wira, “Murowe, mwasome okhala murumeyi, mwa miyaakha *sinci-ene*.”

72 Owo iirale, “Muhale mmuttettheni m’oYerusalemu, mpakha waakhela Owerya okhumaka Wirimu.” Owo aahimeenrye eyo atthu yahaawerya olepa nsina naya. “Nto nuumala yeela, Erooho Yoowaarya yookhuruwelani, vano nyuwo munookhala anamoon’Aka, okhuma oYerusalemu, oYuteya, oSamariya, ni mpakha omalenle elapo.” Iwo p’ukhalihwa murumeyi.

73 Hiyo khanrina olemppwa ya Yesu otonko awe orowa exikola emosa, wala omaliha osoma mwa hata iseminaariyu. Nnya, sinnikhala iseminaariyu sinci-enexa sintekiwa mwa Nsina Nawe, wa mawoko a etiini, ovikana sinkhalaaya wa ekina—etthu ekina etonko okhala molumwenkuni. Hiyo khinnakhalaneke ele—elepeliwo emosa ya Owo otonko awe orowa oxikola. Masi, nnakhala vo, sinnikhala ixikola sinci-enexa sintekiwa mwa Nsina Nawe ovikana sikhanelle mwa enamuna ekina ya nsina nikhanelle vathi v’erimu, ixikola. Hiyo khinnasuweleke wira Owo oolepa eliivuru. Nnakhala vo, sinnikhala iliivuru sinci-enexa silempwe sa Yoowo ovikana soolempwa sothene sikina silempwe. Nto, olelo, Bibilia Awe ti Eliivuru yoomalelaxa osuweliwa ekhanle molumwenkuni mothene, varyari va soolempwa sothene.

74 Masi, moone, nihiku n’oxekuriwa, awo yaahikhuwela, “T’ani Ule?”

75 Moone, Muluku onkuxa etthu enikhala ntoko wira khehiyo etthu, wira opake etthu mwa yeeyo. Ti yeeyo enimukhalihwa Owo Muluku.

<sup>76</sup> Nto okathi awo amoonaly'aya Owo orwa, okela mukhor'ole eettihaka ekhavalalo, akina aya yiirale, "Owo Mutthu muulupale."

<sup>77</sup> Awo anihimya yeeyo olelo. Sookhala ixikola sa teyoloxiia siniixuttiha, olelo, wira Yesu aari Mutthu muulupale, wira Owo aari Mutthu ooreera murima. Akina wa awo hata aniira wira Owo aari profeta. Vano, vaari wira Owo aari profeta paahi, wala Mutthu ooreera murima, hiyo niri mutampini mwahu. Owo aari oonvikana profeta. Owo aari oonvikana Mutthu ooreera murima. Onaamwi, Owo aari Mutthu ooreera murima. Onaamwi, Owo aari Muluku-Profeta. Masi Owo aari oovikana yeeyo. Owo aari Muluku owooniheriwa mw'erutthuni, wira attipihe etampi.

<sup>78</sup> Nto okathi Owo okenlyaawe, eettihaka ekhavalalo, athu anci-ene yiirale, "Owo mpenuxa. Oh, hiyo noomoono Owo waathukula maitho alipa-oohoona. Hiyo noomoono Owo omweettiha mutthu oorakala. Hiyo noomoono Owo ovahererya mavekelo, nto ettekuxa khimuhiya mwaana." Masi, nto, muthinto owo w'athu yaamutthara Owo paahi mwaha wa mikatthe ni ihopa.

<sup>79</sup> Nto ti siiso athu ary'aya olelo, anci-ene. Aakhalaka-ru mpenuxa, vano, awo—awo anoomutthara Owo, ni Owo paahi ti—Owo onkhala paahi maasi mothakoni. Awo yawereiwaru, awo anoothimaka, yiire, "Oh, xontte mookhala ookivekelela, wira Pwiya Yesu akivonihe?" Nto awo ekhumakaru oxipiritali, wala voolilini va muretta, naanaanoru anoothikela molumwenkuni, ntoko mwalapwa athikelaka vamarapheyoni vawe, wala ekuluwe vamaroveni vaya, ntoko Yoolempwa ehimalyaaya. Animutthara Owo paahi mwaha wa ele yooreera awo akhanlyaaya ophwanyaka wa Yoowo. Awo animurumeela Owo paahi ntoko ni—nipotto noopatthiwa, wala—wala ethu e—awo akhanlyaaya ophwanyaka wa Yoowo, ni ohiwehererya omurumeela Yoowo. Athu awo nlelo aakhala olelo.

<sup>80</sup> Yaahikhala anamaretta athanu n'axexe yaavonihiwe, nto mmosa t'ahokolonwe wira amuttotlopele Yoowo. Wala yaari muloko? Awo, mmosa aya, aahihokolowa wira amuttotlopele Yoowo, nto akina aya yaahirowa, oohixukhuru.

<sup>81</sup> Nto vaakhanle wira athu wAmerika, avonihiwe ni Owerya wa Muluku, yaamurukunxela mirima saya wa Muluku, waamukhala muhakalaliho waarowa okhuruwela elapo ela waarowa otthuka ipaare sothene, waarowa... Ilooca sa soowurya soohapala ni iloooca sa wiskhi khisaarowa woonaneya nnakhala. Ikereja saamukhala soosareya. Iteyaaturu saamukhala siyo Ttiminku ohiyu. Ni waamukhala muhakalaliho woomwareela, elapo ela. Masi awo yoonaka eyo wiiraneya, itthu Muluku siniir'awe, awo nlelo anookhuwela, "T'ani Ule? T'ani ula onrwa? Awo akhumme woowi? T'ani ula? Owerya xeeni oniiraniwa yeela?"

<sup>82</sup> Nkinkhalakhala kiliyalaka, oJoanesburgo, Afrika du Sul. Kaammalaru ophiya, minuutu soophiyaka miloko miraru ottuli, mmutteekeni. Kaahikhala mahiku mararu othana n'uhiyu musulu, ookhulumuwa vanci-ene vahaaweryaaka ovilela. Awo—awo khukiroiha nipuro na sookhumelela vaavo atthu oophiyaka ikonto miloko mithanu wala miloko mithanu na mosa yaathukumannyaya. Nto kiphiyakaruru vaplataforma, mpakha Erooho Yoowaarya... Miyo kaahimoona, oviraka nipuro nlo, ka—karera mmosa. Ni aahikhalana nipawe vaavo, “Durban.” Kaahoonu wira mmiravo mmosa aahaana onyakulihana ni okhuma ohikhanle n'atithi awe ni ame awe, ni mwetto mmosa wookhuveya isentiimeturu muloko ni tthaaru wala muloko ni thanu ovikana mukina. Owo aawanre ekamisa yootteela, ni ikweeco sa mukhoyi saavarela ekalsa awe. Nto miyo kaahinweha mmirav'owo. Kiweha-tho ottuli. Yoowoona yaahirowa. Vano nto, okathi vakhani paahi, kaahoonu Waarya iwe wiithomeiye-ene vasulu va mmiravo, ottuli saana voowiryanani. Nto miyo khuweha. Miyo khuupuwela, “Miyo koomoona nipuro nlo.” Khunweha, nto Waarya iwe waahikhala vasulu vawe minuutu vakhani. Nto miyo kaamulipelela mulipa-ootaphulela wira avare moolumo oottharelana. Vano kaahimoona mmiravo yoole ovenya, khwaarihela attootto awe, nto mwetto awe wookhuveya isentiimeturu muloko ni tthaaru khukhala woolikana ni mukina.

<sup>83</sup> Nto miyo khimuhimeerya Mwenye A. J. Schoeman; yoowo ori Movuwani, ohiy'ula. Miyo khwira, “Mwenye Schoeman, muhime moolumo aka paahi. Eyo ti yoowoona.”

Owo khwira, “Vaareera.”

<sup>84</sup> Nto miyo khwira, “Mmiravo okilaanthe ottuli iwe owanre ekamisa yootteela, ni ikweeco, owo okhumme epooma emosa eniihaniwa Durban, ikilomo ikonto piili ni imiya xexe elapo ela, mukarerani. Ni aahaana okhuma ohikhanle n'atithi awe n'ame awe, wira orwe. Masi owo oomwaamini Pwiya Yesu, ni owo orina mwetto mmosa wookhuveya isentiimeturu muloko ni thanu ovikana mukina.”

<sup>85</sup> Nto mmiravo khutupha. Owo aari vale, eemenleene, otthunaka waavara attootto awe. Nto miyo khwira, “Mmiravo, Pwiya Yesu ohoovonihani.” Nto naanaanoru mwetto awe khookowa isentiimeturu muloko ni thanu, khukhala woolikana, ntoko sikina. Vano awo khimuruuha mmiravo vaplataforma, vano matothoro khunwehaweha vaavale. Munnoonu elatarato awe muliivuruni mwaka.

<sup>86</sup> Miyo kaaheemela vaavale okathi vakhani paahi, khoona ekaaro, yaamukhaani yooripelela etthimakaka muramphani, khutherekuwa. Eyo khurukunuwela, ottuli, khumana mwiri. Mwali mmosa a maihi a ncano aari... aahinteya muthana. Nto miyo khwira, “Kinnoonu ekaaro, yaamukhaani yooripelela

etherekunwe khumana mwiri, ni mwali mmosa a maihi a ncano a miyaakha soophiyaka muloko ni mithanu na miraru ontheiye muthana. Owo ori ni mukhalelo wowoopiha.” Khaavo aakhunle. Ni nkaawerya omoona owo hata nipuro, vamuthukumanoni vale wootaphuwa muulupale w’atthu. Nto miyo khukhala vale minuutu vakhani paahi. Miyo khwira, “Musuwele saana. Eyo. . . Muhikhale oohova. T’Apwiya Yesu, mwa Owerya wa ohihimuwa. Awo aveleelinhe Erooho Yoowaarya wira etthikele muteko Aya.” Nto vale kaahoona yoowoona ene okhumela-tho. Ni nkaawerya omoona mwali uwo.

<sup>87</sup> Okathi ene yoowo, oryeene ohoolo waka wene, va waari Waarya weiwe, ntoko sinoon’anyu valataratoni. Nto Owo waaphwanyaneya va. Miyo khurowa vale, nto owo aampaathale vale, vathi vaplataforma. Miyo khwira, “Mwaamuthiyana, Apwiya Yesu ahoovonihani.” Vano owo khupacerya wunla.

<sup>88</sup> Ame awe khwira, “Oh, nnari! Muhimwiirele wira avenye!” Oniira, “Owo aittikinyaru, onimookhwa.”

<sup>89</sup> Nto mwali uwo khweemela naanaanoru, akhuwelaka, ni omuttotopelaka Muluku. Vano ame awe khuhileya khumorela vanrepani mwali uwo aampaathalyaawe.

Exeeni iyo?

<sup>90</sup> Ntoko okathi ene yoole, mulopwana mmosa namuulumela khuyenya ottuli iwe, khukhalana mwetto mmosa vakhaterani, ni mukina vasulu v’ekina, nto khwira, “Nyuwo, mutthu a wAmerika! Miyo kinnootharimulani wira mukileele mwa Nsina xeeni muniiraanyu yeela! Ni muromolelo xeeni wa ekereja muniiraanyu mpantta?” Munnona?

<sup>91</sup> Etthu emosaru paahi. Awo khansuwela. Awo khanwehererya itthu iya. Ikereja khasinwehererya Orwa w’Apwiya. Nto Erooho Yoowaarya eri vaava wira elipherye Orwa Waya, wira ekhumelelihe Eyo. Vanci-enexa. . .

Khula mmosa onthuna otthara ephiro awe. Ti siiso yaary’aya iwe. Khula nikhuru naahikhalana muupuwelo aya mmansaya.

<sup>92</sup> Masi owo kuhiyo ti mwaha ohiy’ula. Kahi yeeyo enihimy’aka. Masi etthu ene enookohaakani, t’ila, munuupuwela wira Eyo exeenii? Eyo enoocalani nyuwo. T’ani Ula onviravira mulaponi? Kahi atthu. Atthu khanwerya wira itthu iyo. T’ani Uwo onlavula ni waahimeerya atthu vamuthukumanoni, ntoko, “Okilante va, vaava va,” ni mapuro oohiyana-hiyana vamuthukumanoni, okathi athiyana n’alopwana aniruhiw’aya mu, ekhwaaka? T’ani Uwo?

<sup>93</sup> Mwamuthiyany’ole okhuruwenle nipuro noopatisa voosiis’ula, yoowo isumana tthaaru sivinre, aakhwa mwaha wa kankuru a nikhuli, onkhala wenna nno Ephiro Maple, Muhano Baity. Nto miyo kaahaakoha matothoro araru yaari ni yoowo.

Owo khaarina hata oreeriwa w'okhala mukumi, ni aana axexe wala athanu axikhaani, nto ame aka ephavelaka waakhapelela. Amaama khwira, "Bill, owo khonrowa-tho otthikela owaani."

<sup>94</sup> Vano miyo khurwa nipuro vaary'awe, ni Pwiya Yesu khulavula, "SIISO ANIHIMYA T'APWIYA, owo arowaru okereja khumuhimya natiri wira onoopatisiwa ni Nsina n'Awia Yesu, ni wira onoorowa omurumeela Muluku, owo onoorowa owaani, mukumi."

Nto miyo kimukoha, "Munimwiira yeela, muhano?"

<sup>95</sup> Nto owo khwira, "Sothene munihimy'anyu, miyo kinimwiira." Naanaanoru owereya khumala. Mahiku mararu ohoolo waya, owo aari owaani, nto matothoro khanwerya ophwanya nlepa nimoso na kankuru uwo.

<sup>96</sup> T'ani Ula onrwa mwa Nsina n'Apwiya? T'ani Uwo? Eyo Erooho Yoowaarya ya Muluku. Muupuwelo anyu t'uvi wa Yeeyo? Muupuwelo anyu t'uvi, mwaasuwelaka apastore anyu? Ni akilaanthe-ene ikhukulu iya va, atthu a ota wa epooma, akilaanthe ni ecile, akilaanthe ni . . . Va okilaanthe mulopwana mmosa, nipuro nlo mu, munna Mennoniita, vaava va, aahaawa ni ecile. Nkinatoko omusuwela wala omoona, hat'etthu ya yoowo. Nto naanaanoru, miyaakha soophiyaka miili sivinre, woona waka, wala etthu siiso, ayo, miyaakha miili, Erooho Yoowaarya yaahiihana, khwira, "SIISO ANIHIMYA T'APWIYA." Owo khonamoreke okhuma okathi yoowo. T'ani Uwo? T'ani Uwo?

<sup>97</sup> Muthiyani'ola aakilaanthe va, Ettiminku evinre, okathi wookiserya kaaryaaka vaava, aakhumme nipuro nlo oIllinois. Mmeeloni mwaya. . . Ni muuwe muulupale mw'erutthuni mwawe, waari wootakhala. Nto amosa-amosa w'ale oosuwelaxa a siyensiya a mameetiku a oIllinois yaammukuxa emuroihaka ekiliinika yuulupale, wira ooperariwe, Esekunta. Vano owo khupunyeera wira avire. Nkinatoko omoona wala wiiwa sa yoowo, kookhalaru. Nto naanaanoru, Erooho Yoowaarya khimukhuruwela, Eyo khimuhimeerya ole aaryaawe, nipuro naakhumaly'awe, ni wira aarowa wooperariwa mmeeloni mwaya. Akavi yaari vaava nihiku nenlo, yoonale yeeyo? Ni yoonale ihapari orwa. Mmeeloni mwaya, varonwaawe wa tothoro, awo khimuroiha ekiliinika ni ekiliinika, nto khanwerya ophwanya nlepa naya.

<sup>98</sup> T'ani Ula? Oh, Muluku amoriwe ikharari! T'ani Ula oniira yeela? Mwaamweererya wira ti pastore anyu? Nnakala. Mwamweererya ohimya wira atthu aakhalana-vo etthu mwa yeeyo? Nnakhalala. Eyo Erooho Yoowaarya, Erooho yaari mwa Pwiya'ahu Yesu. Nto Orwa Wawe wira ophitaane ni Ekereja Awe, ori vakhiviruxa mpakha Owo onooniheryaawe Waarya Wawe wuulupale wowaarya, wira avuluxe, ni aruhe mopatthanani, Ekereja ya Muluku mukumi, wa Okuxiwa ori vakhiviru. Amen!

<sup>99</sup> T'ani Uwo? Miyo nkinwerya waakhula yookoha anyu. Miyo nkinwerya owaakhulelani. Masi kinniwerya wisaakhulela. Ni vasulu va epulpitu ila yooreerihwa, ohiy'ula, mmaaruni mwa yeela, ekupaniya, ni o—othuma w'Ephome ya Pwiy'ahu Yesu, miyo kinihimya ela okhuma vathi va murim'aka. Kahi mwaha wo wira miyo ka mmosa a nyuwo, kahi mwaha wo wira miyo ka mutthu oovirikana paahi, masi mmosa w'ale oovuluxiwa orapihiwe ni Ephome. Miyo kinnaamini wira Waarya omosaru omphwanyaneya mukereja mu, ohiy'ula, mmosaru Yoowo onnooniherya, ni mukhalelo Aya, wira Ti Yesu Kristu, mwa mukhalelo wa Erooho Yoowaarya.

<sup>100</sup> Khula mutthu onsuwela Soolempwa, onnisuwela wira Yesu ohimnye wira, "Miyo kikhumme wa Muluku, ni kinrowa wa Muluku." Owo ohinatthi wiipaka erutthu, okathi waaryaawe ni Moise mothakoni, Owo aari Nripu na Mooro. Nto okathi Moise aatthun'awe omoona, Owo aahivira orukunuwenle-ene ettuli Awe wa yoowo. Nto Moise khwira, "Onkhala ntoko Mutthu." Okathi Owo aary'awe muumu elapo ya vathi, Owo aari Mutthu. Owo aahiira itthu imosaru seiyo Owo oniir'awe, olelo, mwa atthu Owo aavulunxaawe. Owo ohoorwa vale khukhalana elatarato Awe ekumihiwe. Exeeni iyo?

<sup>101</sup> Nuumala okhwa Wawe, ovithiwa ni ohihimuwa, Paulo arowaka oTamasiku, nihiku nimosa, nto Waarya wuulupale waahimmoroza. Alopwana ale yaamwaattamenle khiyoonale Waarya iwo. Masi Owo waammoronxe Paulo, mpakha omukhaliha ohoona. Owo aahikhalana mukattyamiho ni maitho awe ekumi awe yothene. Ni owo aahihimya emaara emosa, "Wira kihikuxererye mwaha wa itthu suulupale sa muupululo, koovahiwa," mwiiwa mweerutthuni mwawe, namuhupi a Satana, wira ammaneke. Okhala wira yaari eyuulupale ya muupululo.

<sup>102</sup> Nto okathi Paulo omoroxiwaawe, orowaka wira aalupatthe atthu yahaareere onyakula; nikhuru naayariwe vasya, atthu yihaniwa ookawanyeya. Paulo arowaka waalupattha yaawo, ni ipaphelo mpoolosani mwawe, wira aatthukwe aaruhe oYerusalemu. Nto voophiyaka othana eriyari, waahikhuruwa Waarya, waammoronxenle, vathi, vano owo aahimorela vatthayani v'elapo. Naahirwa Nsu nimosa naakhuma moWaaryani memmo, niiraka, "Saulo, Saulo, munikilupatthelani?"

<sup>103</sup> Nto Saulo aahirukunuwa, aryeene ohoona, khuweha osulu. Ni aahiwerya woona Waarya iwe, wuulupale ni woovuwa. Nto owo khwira, "Pwiya, Nyuwo mw'Ani?"

<sup>104</sup> Owo khwira, "Miyo ka Yesu. Kikhumme wa Muluku; khurowa wa Muluku. Kikhumme wa Muluku; kintthikela wa Muluku." Owo khwira, "Ti yoolipa wa nyuwo ovirikanya masooso."



<sup>105</sup> Muupululo mmosa vanthaakani vale vooreerihiwa, emaara emosa nipuro nle, mutthu khonwerya-tho okhala yoowo. Mutthu, owo ohinatthi wiisihana muKristu, ohinatthi wiisuwanyeiha mmansawe, owo aahaana toko okhalana musuwelelo ole wa wiithela wa othakoni, weiwo owo okumannyawe ni Muluku, ethoni ni ethoni.

<sup>106</sup> Tthiri, olelo, nyuwo pooti okhalana khula enamuna ya eyaakhulelo. Munoowerya omoona Muluku opaka voolikana ele Owo ohimalyaawe wira mwiire, nto mateyooloku oosuwela anootaphulela wira Eyo ti yoowoothiwa. Awo animwiira, “Eyo yaari ya nihiku nikina. Eyo yaari ya *ela*. Wala, Eyo ti ya okathi mukina. Wala, Eyo ti yoovonyeya.” Ntoko awo saahimmyaaya sa Yesu, “Owo ti Pelizepuli, xetwani. Owo nahako.” Ni itthu sothene iyo, awo arin’aya waakhula.

<sup>107</sup> Masi vakhalaru wira mutthu oophiyererya okumana ni Kristu, ni khumoona Owo ntoko Paulo saamonnyaawe, wala omulawiha Owo, khakhanle hata mateyooloku oophiyerya mulaponi wira awerye omukupaliha wira musuwelelo owo kho-maana.

<sup>108</sup> Mwaha wa yeeyo, olelo, awo ahinkhalanel’aya musuwelelo. Mwaha wa yeeyo awo ahinwery’aya ohimya... othene aya anihimya wira, “T’ani Ula? Exeeni Ila? Eyo enikhuma woowi?” Awo kharina ya waakhula. Mwaha wa xeeni? Okhala wira, sothene awo ansuwel’aya teyoloxiia ekereja khata empanke-aya. Kahi “omusuwela teyoloxiia” ekhanle Ekumi. Kahi “omusuwela Bibilia” ekhanle Ekumi.

<sup>109</sup> Masi “omusuwela Owo” t’ekhanle Ekumi. “Omusuwela Owo” ntoko Moopoli anyu, ntoko Mmosa Ole oosarinheni ni Mukhalelo Awe. Nyuwo mwaari weiwo okathi ekhumelenyaaya. Khaavo hata mutthu onwerya okumiha Eyo mwa nyuwo. Khaavo onwerya wookupalihani wira Eyo ti yoovonyeya. Okathi musuwelelo owo onookhumelel’ayani, nyuwo munoosuwela Owo t’Ani. Wa miyo, Owo ti Yesu Kristu mmosaru nsana, olelo, ni mahiku othene.

<sup>110</sup> T’ani ula ompaka miiriirya iya? T’ani onvara miteko iya suulupale? Ti mulaley? Ti Oral Roberts? Ti Billy Graham? Ti Jack Schuler? William Branham? Onakhaleru pani, awo kharina nnaata n’iyo. Awo ikaruma.

<sup>111</sup> Eyo Erooho Yoowaarya eniikumiherya ni Ehapari yooreera, mwa ithoonyeryo ni mitikiniho ni miiriirya, wira yaakhalihe athu oolikana. Ettheke yoosarya nrromelo, n’alipa-oowaamini enwehereryaka Owo orwa.

<sup>112</sup> Nto akina aniira, “Mwaha wa xeeni mihakalaliho iya? Xeeni hiyo okhalanaka? Nrowe nitteeliwe murima n’ekereja.” Vano, yoohimmwa mukereja vaava, wira, vapacenryaahu oteka ekereja esya, yiiriwe, “Hiyo khanimphavela miiriirya. Hiyo khanimphavela-tho itthu iya. Nyuwo mwaatthunaka, murowe

opuwani weiwo sinkhumelel'aya. Hiyo khanimphavela iyo va." Tapernakulu Branham yaphiyerya-ru nipuro nlo na vathi, yoopwina.

<sup>113</sup> Ekerej'ela etekiwe vasulu va ikano ni Owerya ni Ehapari yooreera ya Yesu Kristu. Nto etapernakulu ila yaakhalaka-ru, Erooho Yoowaarya yoovuwa ewerye ophwanya minepa, wira yoopole, ni esarihe ni Erooho Yoowaarya, ni yaavonihe aretta. Wa miyo, ti Yesu Kristu mmosaru nsana, olelo, ni mahiku othene.

Nivekele.

<sup>114</sup> Nyuwo mwaahimusuweleke Ole Owo okhanlyaawe, mwaahisuweleke yothene ela mwaha wa xeeni, ni mwaanitthuna osuwela, mwaamutthuna mano ovenxa ntata? Ni wira, nvenxaka ntata nanyu, "Mukivekelele, Munna Branham, wira miyo kimusuwele Owo." Nto Apwiya yooreeriheni. Ni mapuro othene, kinnoona matata anyu.

<sup>115</sup> Vano, Tithi a Wirimu, hiyo ninruuha Mutthak'ola, ni mihokorokho s'atthu avenxaka matata aya, wira yaatthuna esuwela Ola t'Ani. Awo yaatthuna ekhale oopatthana ni Yesu ula muulupale. Wira, Orwa Wawe, wa ohihimuwa, ori vakhiviruxa, mpakha aretta ampaceryaaya ovonihiwa. Nto numala wiiraneya yeeyo, vano elaleeryo y'eprofeta yaahirwa Mukereja, vano soovaha ni miiriirya, mpakha ethoonyeryo ele yookiserya vano. Yootharelana enimoorwa, Okuxiwa, Ekereja enookuxiwa eroihiwe. Nto hiyo, Pwiya, nihimye wira ninnoosuwelani Nyuwo mwa Owerya wo ohihimuwa Wanyu, hiyo nnoowehererya, ni olipelela, ni wunla, ni nivekaka, "Murwe, Pwiya Yesu!"

<sup>116</sup> Mukuxe Ekereja Anyu ni mukumihe, voowaakuveya, Pwiya. Maana, voochilekela, atthu anoorowa ophula elapo Nyuwo mpattuxalyaanyu wira awo ekhaleke-mo, okhala wira awo khawiiwelenleni Nyuwo. Awo khasomme murettele, masi ekhotto. Awo khasomme exariya, masi asomme ohonona. Moota xeeni othene yahaarowaaya ovoliwa etala ya owerya! Pwiya, nipuro nle naamukhaani mmurimani mwaya ninaavoliha etala mwaha wa owerya, awo aneerimya osiveliha nlo mulaporatooriyuni nipuro nlo, wira emphule mutthu mukhwaaya.

<sup>117</sup> Muluku, awo yaawerya paahi osuwela wira owerya iwo awo aninlelaaya ti Owerya wa ohihimuwa wa Mwaana a Muluku, Owerya wa Erooho Yoowaarya wira erukunxe makhalelo aya; kahi ophutula ilapo, masi orukunxa makhalelo aya ni waakhaliha arumeyi Anyu.

<sup>118</sup> Atthu anci-ene, oovariwa anepa a ikuru, awo annisuwanyeiha hiyo ntoko nikhuru na "oohisuwela etthu," ni-ni ntoko "oowiikawanya," ntoko siiraly'aya nihiku noopacerya. Masi okhala wira awo yaahitthikasa, etthapaka, yooxukhurukuni Nyuwo mwaha wo owerya ovilela oveehiwa

wa Nsina Nanyu. Owo ti moonelo wa an'Inyu, ohiy'ula, Pwiya, mapuro othene. Hiyo ninnitteeliwa murima paahi.

119 Amosa-amosa nihiku Nanyu yaahiphavela woosuwanyehani Nyuwo. Awo yiirale, "Owo ti mpatthani awe mulopwan'ole a mutakhwani, Yohani, yoowo okhumme mothakoni ntoko oohiwara ikuwo, ni esapala yaamukhaani ya epwittipwitthi aaiputaputenlyaawe. Mutthu a mutakhwani aaveveleha moolumo, nno ni iwe, ni wira, 'Epasso yooheliwa vamutathaarini va mwiri.'" Khwira, "Owo ti mu—mulipa—oomutthara yoowo. Owo mutthu a mutakhwani. Owo oovahuwa. Owo woompweteya muupuwelo Awe." Muteko wa erimu waari ni Nyuwo, O Pwiya, waahaapwexa maittho awo.

120 Nto siiso tho woowiiraha olelo: Erooho Yoowaarya ela yuulupale enihoolela Orwa w'Apwiya, ntoko Yohani saairaly'awe nihiku nawe, aakhalihaka oohoona atthu, w'ale yahaatthuna woona. Masi w'ale antthuna woona, Nyuwo muhaathanla. "Ni othene ole Atithi akivanh'aya onimoorwa wa Miyo," Nyuwo moohimya, "ni khaavo mmosa a awo onrowa opweteya. Ni Miyo kinoomuhihimuxa nihiku nookiserya." Hiyo ninnooxukhuruni Nyuwo mwaha wa yeela.

121 Nto ale avenxale matat'aya, ohiy'ula, hiyo ninvekela, O Pwiya Muluku, wira Nyuwo mwiisuwelihe Mmansinyu wa yaawo, mwa musuwelelo mmosa, mwa Owerya wa ohihimuwa. Munivahe, Pwiya.

122 Ni akina pooti akhanle-ene va, ahivenxale ntata, masi nnakhala vo, mmurimani mwaya, awo yaanisuwela wira yaanitthuna. Miyo kinvekela wira Nyuwo mwaareerihe, ni mwaavahe entthuna murim'aya.

123 Hiyo nakhuma mpaani mu, ohiy'ula, nirowe ntoko atthu oovirikana. Nirowe ni etthunelo yoovirikana ovikana ele naarin'ahu, nivolowaka, vakhala wira yaari yoovirikana ni otthuna Wanyu w'eMuluku. Nikhume ni eminyalelo yo ovarelela ikhomo s'altaari, mpakha munep'ahu ophiyeriwa wira naahikhalana musuwelelo ni Nyuwo, ni ninnisuwela ya Ole oninlavul'ahu, okhala wira nookumana ni Yoowo ni ninnimusuwela Yoowo, ni nookhalana opatthana ni Yoowo. Munivahe itthu iya, Tithi. Mwaavonihe aretta ni ooriipiwa murima.

124 Mmureerihe pastore ahu oophenteya ni oophwanelaxa. Muluku, hiyo ninvekela wira Nyuwo mukhale ni yoowo n'axirokor'awe oophenteya, okathi aniip'aya Ehapari yooreera, ni olaleya Yeeyo muraatiyuni mwaya.

125 Mwaareerihe aletto ari muhina mwa mikhora sahu. Pwiya, wira awo ekhume, ohiy'ula, ni mukutakutho mmurimani mwaya, ni etthunelo wira awo, okhuma ewoora ela mpakha ohoolo, awo yaahoosuwelekeni Nyuwo ni wira khayoorumeelani Nyuwo, khalayi, awo yoorumeeleni. Nisuwelaka ela, wira, "Itthu

sothene sikina sinoorowa omalamalihiwa, masi Masu a Apwiya anookhala mahiku othene.” Munivahe, Tithi.

<sup>126</sup> Munilevelele, itampi sahu sothene. Ni wira nikumane wa yuulupale ele. . . [Nipuro vahiitthu mufiitani—Mol.]

Okhala wira Owo t’opacentre okiphenta miyo  
Nto oothuma woopowa waka  
Vamwirini w’oKalvario.

<sup>127</sup> Vano, nuumala Mutthaka, nrowe nuuramihe miru sahu nimukokhorele Yoowo, nimwiipelaka Yoowo.

Miyo kinnimphenta Owo,  
Ni murim’anyu wothene.

Miyo kinnimphenta Owo  
Okhala wira Owo t’opacentre okiphenta miyo  
Nto oothuma woopowa waka  
Vamwirini w’oKalvario.

<sup>128</sup> Akavi vekeekhai animphenta Yoowo? Nvenxe ntata nanyu, muhimye yeela ntoko onamoona, “Miyo kinnimphenta Owo.” Oh, Owo kahi oothamaleya? Moosuwela, miyo okisivela okhala siisa ni wiiruweya paahi, mwa enamuna emosa, Mmukhaleloni mwAwe. Masu Awe, ekhumaka, Awo aamorela mmurimani. Awo anninittharuxa. Awo anniniruuha mowiiwelelani Erooho Awe. Moota ekhanlyaaya yoosivela omukokhorela Yoowo nto! Vano, mwaakhumaka okereja, ohiy’ula, murowe, mmukokhorelaka Yoowo.

<sup>129</sup> Ni muupuwele, esumana ela, wookhala muthukumano wa mavekelo vaava Namararu ohiyu. Muhimuliyale prokrama a muraatiyuni a Munna Neville Ttiminku, ahiiso Saapatu, ewoora ya neethanu na xexe, o WLRP. Okisivela saana owiiwasa, ankhiniyuwo? Nikhuru n’axexe, ahiiso araru, anniipa oratteenexa. Amwaar’aka ni miyo, n’anamwane, othene ninnimukuxa raatiyu mwaamukhaani ni—ni ninnimurukurerya, wira nimwiiwe Munna Neville ni eprokrama awe ya muraatiyuni, ni moolumo awe ooreeraxa, a moota owo oninwuihaawe Muluku owo onniphentaawe ni omwaamini. Nkinihimya ela wira. . .

<sup>130</sup> Nyuwo aletto va, mwaahikhalane ekereja, murwe mwiitakaihe ni hiyo. Miyo kinimoolelani, nkinihimya yeela mwaha wo wira owo okilaaanthe vaava. Nnari, mulopwana. Miyo koohimya ela, imaara sinci-ene. Miyo kinnimphenta Munna Neville. Ela, yoopacerya, owo teyooloku. Etthu yoopacerya, owo mwaana a Muluku. Etthu yootharelana, owo mmosaru khula nihiku. Miyo kinnimusuwela mwa miyaakha. Owo khonarukunuweke, hata vakhani. Owo nlelo ti Orman Neville, murumeyi a Apwiya Yesu. Ni kinoona wira ookhalana. . .

<sup>131</sup> Ohiyu uwo, kaahimulikarela, wira kimukohe sinto khaarina, mprokramani mwawe, aamuwerya onivaha opuro wira nirwe naavekelele aretta. Yaahikhala kamosa-kamosa yaarowa orwa,

waari voosiis'ula, moosuwela. Nto amwaar'awe oophenteya khumwaakhula telefooni, ni miyo kaalavula n'amwaar'aka, ottuli iwe, mwaha wa yeeyo.

<sup>132</sup> Ni moota onimuxukhuru-ahu Muluku mwaha wa amwar'awe oophenteya n'amusi awe. Ti yooreera saana. Mwaamoonaka murumeyi ni mwaar'awe yiiwananaka saana siiso, mwa osivela ni wiiveviha, eyo enniiriha paahi ekereja weetta saana. Eyo ti yooreeraxa mahiku ekelelaka ohoolo.

<sup>133</sup> Nyuwo munnimphenta Owo ni murim'anyu wothene? Vaareera. Hiyo nihaana esipo y'olaxeryana yeeyo nniip'ahu, *Mukuxe Nsina Na Yesu Ni Nyuwo*. Ni munivahe woompwa vakhani munna, mwaarine-ene muliivuruni mmo. Nto ninrowa wiipa nsipo nahu n'olaxeryana. Nto naipa eversu yoopacerya, ninthuna nirukunuwe, nivahane matata mmosa ni mukwaawe. Vaareera. Munivahe woompwa.

. . . Nsina na Yesu ni nyuwo,  
Anamwane a mixankiho ni ooriipiwa murima;  
Nlo nnimoovahani otthapa ni olipa,  
Mukuxe Nenlo mapuro othene munrow'anyu.

Nsina nooreerexa, O moota ninsivel'aya!  
Muroromelo wa mulaponi ni ohakalala wa  
Wirimu; (Muluku ooreeriheni, munna.)  
Nsina nooreerexa, O moota ninsivel'aya!  
Muroromelo wa mulaponi ni ohakalala wa  
Wirimu.

Nrowe nikuxe eversu ila vano:

Nsina na Yesu nuurameliwe,  
Nikokhoraka munawoni Mwawe,  
Mwene a mamwene Wirimu hiyo nnomuwaraha  
nleha,  
Okathi ekwaha ahu enimal'aya. (Eyo  
khenrowa okhala yooreeraxa?)

Nooreerexa . . . (Nsina nooreerexa!) O  
noosivela!  
Muroromelo wa mulaponi ni ohakalala wa  
Wirimu;  
Nsina nooreerexa, (Nsina nooreerexa!) O  
moota ninsivel'aya!  
Muroromelo wa mulaponi ni ohakalala wa . . .

<sup>134</sup> Akavi anuupuwela nsipo nahu naamukhaani naaipak'ahu, *Muhiliyale Mavekelo a Amusi?* Munnuupuwela? Miyo nki . . . Thelma, mwaasuwelaka vale yeeyo, wala woompwa, wala nnari? Nrowe nehererye emaara emosa. Khamunuupuwela? Nrowe . . . Khino kaamuwerya wehererya emaara emosa ni nyuwo.

Muhiliyale mavekelo a amusi,  
 Yesu onttthuna okumana ni nyuwo vaavo;  
 Owo onookuxa ovelavela wanyu wothene,  
 Oh, muhiliyale mavekelo a amusi.


<sup>135</sup> Akavi ankhalana mavekelo a amusi? Ti yooreera. Nrowe neehererye-tho. Miyo kinoopacerya-tho va. Okisivela eyo. Othene vamosa vano:

Muhi—muhiliyale mavekelo a amusi,  
 Yesu onttthuna okumana ni nyuwo vaavo;  
 Owo onookuxa ovelavela wanyu wothene,  
 Oh, muhiliyale mavekelo a amusi.

<sup>136</sup> O Pwiya, yoolempwa mwa Soolempwa, wira yaanikuxiwa v'erutthuni va Paulo maleeso wala ikuwo, nto irooho sootakhala saanaakhuma atthu, ni iretta saanivonihiwa. Hiyo ninvekela, O Pwiya, wira enamuna emosaru, yooniheriwe mwa ala, ohiy'ula, kaaveleeliherya-ru ale oothoiwa ni aretta. Nipuro nlo mmapuwani, ookhala mutthu onroromela ni olipelela wira yeela yiiraneye. Miyo kinnivekela, Tithi, wira Nyuwo munivahe mwa Nsina na Yesu, Mwan'Inyu. Amen.

<sup>137</sup> Vano kinrowa ovekela, nuuramihaka muru, wira Munn'ihu oophenteyaxa Smith iwe, a Ekereja ya Muluku, yoowo ninoon'ahu, siiso ntoko Munn'ihu Neville va, okhala murumeyi eekeekhai, oororomeleya, a Muluku, kinrowa onvekela wira avekele wira iparakha sitthikele, okhala mwa nyuwo esuman'ela yothene enoorwa. Muluku ooreeriheni, mpakha nikumane-tho ni nyuwo. Munna Smith.

[Munna Smith onoovekela—Mol.] Ayo, Pwiya. Munivahe, Pwiya. Ayo. Ayo. Ayo. Ayo. Amen.

<sup>138</sup> Nvahane matata mmosa ni mukhw'awe. Murwe-tho vooreera, otapernakulu. Muluku ooreeriheni. 

*T'ANI ULA?* EMK59-0510E

(Who Is This?)

Mutthak'ola wa Munna William Marrion Branham, opaceryawene olaleeriwe ni Enkelesi Nihiku n'Aximaama, Ettiminku ohiyu, mahiku yeettaka 10 mweeri wa Maio, 1959, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)